



SPEG-Info

Spécial "LVR"

LANG KRÉYÒL ANDIDAN LÉDIKASYON :

DÈYÈ GOUMÉ KI NI GOUMÉ !

Ki sityasyon
a kréyòl-la
pou larantré 2019 ?

J'adhère au SPEG !

5 Immeuble Diligenti
BP 489
97164 Pointe-à-Pitre CEDEX
0590910532 Fax : 0590839042

speg@wanadoo.fr
<http://www.speg-guadeloupe.org>

Dépi nanninannan, SPEG té ka mandé pou lang é kilti kréyòl pran tout plas a-yo andidan lékòl-la. Afòs-afòs yo goumé pou sa, lang-la sòti an chimen kòsyè pou pé sa rantré andidan pwogram a-yo kifè jòdijou mèt é métrèslikòl Gwadloup pa oblijé sèvi épi-y anba fèy. Konyéla dépi lékòl mabo jis linévèsité lang-la ka sonné...

Men prangad kanmarad, sa ki an bék pa anfal !

Sé pou sa adan 8tyèm kongré a-y SPEG désidé woulé pou :

Kréyòl rantré an fondòk a projé akadémik la, pou lang-la vin on zouti fondal pouvré èvè plis lè, plis pòs, plis fòmasyon dèpi lékol mabo jis linivèwsité

- On lègzamen kréyòl pou tout mètlélikòl a tilékol
- On fòmasyon dontokèl pou tout pèsonèl adan akadémi-la odyapazon asi lang é kilti kréyòl
- Yo konsidéré kréyòl égal pyèt égal mòdan épi fransé

POU NOU FÈ :

« ON LÉKOL POU DÈMEN, OTILA TOUT TIMOUN GWADLOUP ANMOUVMAN, POU DIVINI A YO É TA PÉYI-LA !»



KRÉYÒL ANDIDAN LÉDIKASYON, DÈYÈ GOUMÉ KI NI GOUMÉ !

Spésyalité Lang, Litérati é kilti andéwò é réjyonal

Réfòwm a lisé a yo la fèt, jan nou té prévwa : Anpangal !


Yo sonjé lang réjyonnal apré kou !

An janvyé pasé, yo mèt lang réjyonal an spésyalité byen apré lisé té chwazi ki spésyalité yo té vlé an lékòl a yo, é lè DGH té ja près rivé an sé lisé-la. Ankò on fwa, kréyòl pa té ni menm trètman ki larèstan a spésyalité. Tousa davwa ministè chonjé lontan apré lang réjyonnal té ka èg-zisté, é té ni plas a yo an spésyalité.

Aprédavwa, yo wouvè spésyalité-la, sa ki té okouran pòté mannèv pou yo mèt kréyòl an spésyalité kon tèks-la té ka prévwa. Men jòdijou, konmen lisé pé di spésyalité-lasa wouvè pouvré ? Asiré-pa-pétèt pa ni onlo.

SPEG lévé cho an CTA pou mandé lakadémi rèspecté tèks a ministè pou yo maké non a spésyalité-la avè mansyon « réjyonal » a-y. Jou lakadémi pa té okouran spésyalité-lasa té ka èg-zisté... Dapré-yo !!!

Sépoulòsdonk, SPEG ka mandé délégé a-y ki an konsèy administrasyon, mandé pou yo wouvè spésyalité-lasa avè kréyòl adan kon i dwètèt, si sa poko fèt !



Ka nou ka atann pou mèt Kréyòl an BTS ?

Lontan, bon enpé zélèv é pwofèsè ka mandé poukirézon yo pa ni kréyòl an sèksyon tèknisyen sipéryè. On Bilten Ofisyèl a Lédiakasyon ki parèt an 2012, ka pèwmèt zélèv chwazi adan on lis a lang pou pasé BTS, kisisisa an prèmyé é dèzyèm lang oben an òpsyon.

Konfèdmanti, an lis a yo la, nou pé vwè brèton, kòws, katalan é dòt ankò... swadizandi, sé lang réjyonal lasa tini menm wotè ki kréyòl... Men anvré, kréyòl pa adan lis-la. Poukwa? Ès sé oubliyé yo oubliyé sa ? Ès sé èspré yo fè-y ? Nou poko ni répons.

Men, akwèdi sé kréyòl yo vlé pa vwè menm!!!!

Davwa sa ni onlo pòtalans, SPEG voyé on lèt ba dépité é sénatè pou mandé-yo fè sa ki fo pou Kréyòl égal pyèt, égal mòdan avè larèstan.

Jòdijou, onsèl réponn-nou pou di i ké mandé gouvèlman kont asi sa ! Nou ka atann pou vwè

**« ON LÉKOL POU DÈMEN, OTILA TOUT TIMOUN GWADLOUP
ANMOUVMAN, POU DIVINI A YO É TA PÉYI-LA »**



KRÉYÒL ANDIDAN LÉDIKASYON, DÈYÈ GOUMÉ KI NI GOUMÉ !

Asi agrégasyon “les langues de france” sèksyon Kréyòl

Lédiakasyon nasyonnal anonsé, yo k'ay mèt agrégasyon a « langues de France » pou sèksyon kréyòl doubout, an 2020. Si SPEG pé yenki kontan pou kréyasyon a agrégasyon-la, ki ké pèwmèt pwofésè kréyòl vansé an karyè a yo, SPEG ka lévé gawoulé para-pòt a kondisyon é sitiayson a lang-la adan konkou-lasa.

Pou yonn, pogrom a agrégasyon-lasa parèt lè 28 out 2019, Sa pa séryé ! Konfèdmanti, lè nou ka gadé sé lézòt agrégasyon-la, pwogram parèt dèpi an Avril, oplita okoumansman a mwadjen pou yonndé dènyé. Antoutjan, sa ka ba moun ki vlé paré agrégasyon sèksyon kréyòl mwens tan ki lézòt. 4 mwa an mwens, sé onlo !!! Piplis ankò lèwwè tout konkou a agrégasyon sé anmenmditan yo ka fèt. Pa on jou, oben on simenn an rab ! Ankò on fwa, pwofésè kréyòl pa ni menm konsidérasyon ki lézòt pwofésè silon gouvèlman. Piplis ankò, lè ou ka vwè chaj travay-la! Yenki asi prèmyé éprèv-la fò ni konésans asi tout kréyòl men osi tout lang réyonal ki an agrégasyon-la.

Poukirézon on éprèv ankommen pou tout lang réyonal ? Ès kréyòl é chak lang réyonna pa ni asé wotè pou yo ni on agrégasyon pou yotousèl? Ès lang réyonal bizwen on tit anplis ki lézòt lang, pou yo di yo ni nivo agrégasyon ?

Pou ki préparasyon ? Jòdijou, poko ni p'on préparasyon pou tousa ki vlé paré agrégasyon-la.

É pou konmen pòs ? A sa nou vwè dèpi agrégasyon-lasa fèt, kon lézòt sèksyon, nou pé près sèten sé onsèl pòs yo ké wouvè pou tout Lafrans.

Ès sé pou chak lanné ? Ayen pa ka di sa. Konfèdmanti, si nou gadé lojik a ministè, sé fè agrégasyon-la touné ant sé diféran lang réyonal la.

Anfilnaldikont, sé byen je yo ka fè épi tèt an nou !

Tousa ka montré konsidérasyon lédikasyon ni parapòt a lang réyonna. Sépoulakòz, annatan-dan, Lafrans poko jen sinyé Chawt éwopéyen a lang réyonna, men yo ka bat lèstonmak pou di yo ka rikonnèt tout lang ki andidan péyi-la.

Sé pou tousa, SPEG :

- *ka mandé plis konsidérasyon pou lang kréyòl ;*
- *ka gomé pou yo ba kréyòl-la plas-la i mérité la ;*
- *ka mandé yo mèt kréyòl an spésyalité an tout lisé ki mandé ni spésyalité « LLCE » andidan akadémi-la ;*
- *ka mandé yo mèt kréyòl an BTS-la*
- *on politik akadémik pou lang kréyòl an akadémi-la.*

Si fò nou rété véyatif avè sa yo bizwen fè èvè lékòl-la, fò nou véyé-jé a yo plis ankò èvè sa yo bouzwen fè évè lansèyman a kréyòl adan lédikasyon!

Pou konba-lasa asiré, kréyòl é pwofésè kréyòl pé apiyé asi SPEG !



**« ON LÉKOL POU DÈMEN, OTILA TOUT TIMOUN GWADLOUP
ANMOUVMAN, POU DIVINI A YO É TA PÉYI-LA »**

**KRÉYOL ANDIDAN LÉDIKASYON,
DÈYÈ GOUMÉ KI NI GOUMÉ !**



SPEG ka kontinyé lalit !